



Inatsisartunut ilaasortamut
Per Berthelsen
Demokraatit

21-08-2026
Sags nr. 2026 - 15170
Akt. id. 26765354

Postboks 260
3900 Nuuk
Tlf. (+299) 34 50 00
Fax (+299) 34 63 64
E-mail: isn@nanoq.gl
www.naalakkersuisut.gl

Angerlarsimaffeqannginnerup pillugu § 37 naapertorlugu apeqqummut nr. 168-2026-mut akissuteqaat

Asasara Per Berthelsen.

Apeqqutinut qujanaq. Apeqqutit ataasiakkaarlugit allaqqinneqarput, akissutaannik malitseqartinneqarlutik.

1. Angerlarsimaffeqannginnerup akiorniarneqarneranut suliniarnermut maannakkut inatsisit aamma sinaakkutaasut Naalakkersuisut qanoq nalilerpaat?

- a. Naalakkersuisut nalilernerpaat, maannakkut malittarisassaasut kommunit Namminersorlutillu Oqartussat naammattumik sakkussanik tunigaat angerlarsimaffeqannginnerup pinaveersaartinnissaannut aaqqiiviginiarnissaanullu?**

Akissut:

Maannakkuugallartoq angerlarsimaffeqannginnermik suliaasaqarfik pillugu sulinermut immikkut ittumik ataatsimoortumik sinaakkusiisumik inatsiseqanngilaq. Naalakkersuisut angerlarsimaffeqannginnermut periusissiaat inersimasunut isumaginninnermut inatsisiliornissamik aallartitsinissaq pillugu imaqarpoq. Isumaginninnermut inatsisiliorneq qaqugu suliarineqassanersoq pillugu sulii piffissamik pilersaaruteqanngilaq.

Isumaginninnermut suliaasaqarfimmi sulinermut kommunit namminneq periaaseqarnissamut kiffaanngissuseqarput. Suliaasaqarfimmi kommunit sulinerannik ataatsimoortumik sinaakkusiisumik immikkut inatsiseqannginnera pissutaammat, kommunit tamanut atuuttumik ingerlatsinikkut sinaakkutit inatsisillu atuuttut malillugit inersimasut angerlarsimaffeqanngitsullu atugarliortut pillugit pitsaaliuinnermik suliniutinillu anguniagalinnik suliaqarsinnaapput. Piviusumik tamanna isumaqarpoq, kommunit inatsisitigut sinaakkutit iluanni angerlarsimaffeqanngitsut pillugit anguniagalimmik isumaginninnikkut suliniutinik aallartitsinnaasut.

Tamanna tunngavigalugu suliaasaqarfimmi sinaakkutit ersarissarnissaannut pisariaqartitsisoqartoq Naalakkersuisut nalilerpaat.

- b. Naalakkersuit suut eqqarsaatersuutigaa inatsisinik nutaanik pineqartumut pisariaqartitsisoqarnersoq?**



Akissut:

1.a pillugu akissut innersuussutigineqarpoq.

c. Suut aningaasatigut allaffissornikkullu kingunerussappat
angerlarsimaffeqannginnerup akiorniarnissaanut annertusaanermi ersarinnerusumik
inatsisiliornikkut, pitsaanerusumik nalunaarsuinikkut aammalu toraagalinnik
amerlanerusunik neqerooruteqarnikkut?

Akissut:

Inersimasunut isu­ma­ginninnermut inatsisiliornermut atatillugu, peqatigalugu aningaasaqarnikkut
allaffissornikkullu kingunerisassat pillugit naliliinermik suliaqartoqartariaqarpoq. Inatsisiliornernup imarisassai
suli naluneqarmata, maannakkuugallartoq tunngavigisat malillugit kingunerisassat
erseqqissarneqarsinnaangillat.

**2. Qanoq akisussaaffik agguataarneqarnikuua Naalakkersuisut kommunillu akornanni inatsit
atuuttoq malillugu innuttaasunut, angerlarsimaffeqanngitsunut imaluunniit
angerlarsimaffeerunnissaminnik ulorianartorsiortunut?**

Akissut:

Kommunimi innuttaasunut isu­ma­ginninnermut suliniutit tigussaasut kommunit isumagisassaraat,
suliassaqarfimmilu pingaarnertut sinaakkutit Naalakkersuisut isumagisussaallugit. Apeqqummut 1.a-mut
akissut ilanngullugu innersuussutigineqarpoq.

3. Angerlarsimaffeqanngitsut annertussusaat Naalakkersuisut ilisimasaqarfiginerlugu??

Akissut:

Naalakkersuisut angerlarsimaffeqanngitsunik nuna tamakkerlugu kisitsineq siul­leq 2022-mi suliaritippaat.
Kisitsinerup takutippaa kommunit tamaasa akimorlugit angerlarsimaffeqanngitsut 491-iusut. Takussutissiami
1-imi takuneqarsinnaavoq kommunikkaartumik agguataarneqarneri.

Takussutissiaq 1: Kommunikkaartumik angerlarsimaffeqanngitsut amerlassusaasa agguataamerat, 2022

Kommuni	Amerlassuseq
Avannaata Kommunia	87
Kommuneqarfik Sermersooq	258
Kommune Qeqertalik	16
Qeqqata Kommunia	24
Kommune Kujalleq	106

Najoqqutaq: 2022-mi nuna tamakkerlugu angerlarsimaffeqanngitsunik kisitsineq

Naalakkersuisut 2026-mi angerlarsimaffeqanngitsunik kisitsinermik sulinissaq tapersersorpaat.
Angerlarsimaffeqanngitsunik kisitsineq ilisimatusarfi­mmit suliarineqarumaarpoq. Taamaattumik nuna
tamakkerlugu kisitsisit kingulliit naatsorsorneqartut suli tassaapput 2022-mi angerlarsimaffeqanngitsunik
kisitsineq.

**4. Kisitsisit suut innuttaasut angerlarsimaffeqanngitsut annertussusaat pigineqarpa, kommuninut
ataasiakkaanut immikkoortillugit?**



a. Ullumikkut angerlarsimaffeqannginneq pillugu qanoq paasissutissat katersorneqarlutillu nutarterneqartarpat, tassani paasissutissaat ukiuinut, suaassusaannut, ilaqutariinnermi inissisimanerannut aammalu angerlarsimaffeqannginnermut pissutaasut?

Akissut:

Apeqqummut 3-mut akissut innersuussutigineqarpoq, kommunikkaartumik kisitsisit agguataarnerat kingulleq takuneqarsinnaalluni. Paasissutissat 2022-mi nuna tamakkerlugu angerlarsimaffeqanngitsunik kisitsinnermiit pissarsiarineqarput. 2026-mi angerlarsimaffeqanngitsunik kisitsineq nutaaq ilisimatusarfimmit suliarineqassaaq. Naalakkersuisut naatsorsuutigaat, ukiut, suaassuseq ilaqutariinnermilu inissisimaneq ilanngunneqarsinnaalluni naatsorsuisoqassasoq. 2022-mi angerlarsimaffeqanngitsunik kisitsinnermi angerlarsimaffeqannginnermut suna pissutaanersoq nassuiaateqarfiginissaa ajornakusoortoq naliliiffigineqarpoq, 2026-mili angerlarsimaffeqanngitsunik kisitsinnermi tamanna ilanngunniarneqarnersoq pillugu Naalakkersuisut ilisimatinneqanngillat.

b. Qanoq Naalakkersuisut nalilerpaat nunatsinni aaqqissuulluagaasumik nalunaarsuinnermut pisariaqaartitsisoqarnersoq imaluunniit angerlarsimaffeqannginnerup erseqqissarnissaanut??

Akissut:

Naalakkersuisut isumaqarput angerlarsimaffeqannginnermut suliaasaqarfik nalunaarsuiffigissallugu pisariaqartoq taamaalilluni angerlarsimaffeqannginnerup qanoq annertutiginera ilisimasaqarfigilerlugu. Suliaasaqarfiup ajortumut ajunngitsumulluunniit ineriartornersoq pillugu naliliisoqarnissaa pingaaruteqarpoq. Tamatuma saniatigut angerlarsimaffeqannginnermut pissutsit suut pissutaasinnaanersut ilisimassallugu pingaaruteqarpoq.

Angerlarsimaffeqannginneq pillugu kisitsinnerup qanoq akulikitsiginissaa pillugu Naalakkersuisut sulii aalajangersaanngillat.

5. Suliniutit suut aallartinneqareerpat imaluunniit pilersaarutaappat angerlarsimaffeqannginnerup suliniutigineqarnerata nukittorsarnissaa? a. Qanoq ilillutik Naalakkersuisut qulakkeerniarpaat, angerlarsimaffeqannginnermut suliniutit suliniuteqarnissamik pilersaarutaannaassanngitsut, aammali ersarissunik malittarisassiorneqassasut, akisussaaffimmik inissiisoqassasoq tigussaasunillu suliniutissanik periarfissanik sanasoqassasoq?

Akissut:

Apeqqummut 1.a-mut akissut innersuussutigineqarpoq. Tamatuma saniatigut Naalakkersuisut 2026-mi angerlarsimaffeqanngitsunik kisitsineq pillugu suliaqarnissaa tapersorsorpaat. Nuummi innuttaasunut atugarliortunut Housing First pillugu neqerooruteqarnissamut Naalakkersuisut Kommuneqarfik Sermersooq suleqatigalugu ilanngullugu pilersitsipput. Neqeroorut 2024-mi februaarimi ammarneqarpoq innuttaasunullu katillugit 15-inut inissaqarluni.

Inatsisitigut sinaakkutit ersarinnerusut pillugit apeqqummut inersimasunut isumaginninnermut inatsisiliornermik aallartitsinissaq innersuussutigineqarpoq, tak. apeqqu 1.a.

6. Naalakkersuisut oqaluuserisamut soqutiginaatilinnik allanik paasissutissiisinnaanerlutik?



Akissut:

Naalakkersuisut isumaqarput angerlarsimaffeqannginneq innuttaasunut ataasiakkaanut inuiaqatigiillu tamarmiusut isigalugit ilungersunarlungu erloqinartoq. Angerlarsimaffeqannginneq assigiinngitsorpasuarunik pissuteqartarpoq, aammalu pisuni tamani immikkut pissuteqarsinnaavoq, soq inuk angerlarsimaffeqanngitsutut inississimanersoq.

Naalakkersuisut isumaqarput housing firstimik periuseq aallaavigalugu angerlarsimaffeqannginnermik suliaqartoqassasoq. Tamanna isumaqarpoq, atugarliortut ajornartorsiutaannik allanik ikiorneqannginneranni siullermik aallaqqaammullu angerlarsimaffeqartinneqassasut. Angerlarsimaffik toqqissisimasumik pitsaasumillu inuuneqarnissamut tunngaviuvoq.

Inussiarnersumik inuulluaqqusillunga


Maritha Broberg



13. august 2026

Inatsisartut ingerlatsinermut maleruagassaasa § 37 imm. 1 tunngavigalugu matumuuna ukunannga Naalakkersuisunut apeqquteqaateqarpunga.

Naalakkersuisunut apeqquteqaatit:

1. Angerlarsimaffeqannginnerup akiorniarneqarneranut suliniarnermut maannakkut inatsisit aamma sinaakkutaasut Naalakkersuisut qanoq nalilerpaat?
 - a. Naalakkersuisut nalilernerpaat, maannakkut malittarisassaasut kommunit Namminersorlutillu Oqartussat naammattumik sakkussanik tunigaat aangerlarsimaffeqannginnerup pinaveersaartinnissaannut aaqqiiviginiarnissaanullu?
 - b. Naalakkersuit suut eqqarsaatersuutigaat inatsisinik nutaanik pineqartumut pisariaqaartitsisoqarnersoq?
 - c. Suut aningaasatigut allaffissornikkullu kingunerussappat angerlarsimaffeqannginnerup akiorniarnissaanut annertusaanermi ersarinnerusumik inatsisiliornikkut, pitsaanerusumik nalunaarsuinikkut aammalu toraagalinnik amerlanerusunik neqerooruteqarnikkut?
2. Qanoq akisussaaffik agguataarneqarnikuua Naalakkersuisut kommunillu akornanni inatsit atuuttoq malillugu innuttaasunut, angerlarsimaffeqanngitsunut imaluunniit angerlarsimaffeerunnissaminnik ulorianartorsiortunut?
3. Angerlarsimaffeqanngitsut annertussusaat Naalakkersuisut ilisimasaqarfiginerlugu?
4. Kisitsisit suut innuttaasut angerlarsimaffeqanngitsut annertussusaat pigineqarpa, kommuninut ataasiakkaanut immikkoortillugit?
 - a. Ullumikkut angerlarsimaffeqannginnerup pillugu qanoq paasissutissat katersorneqarlutillu nutarterneqartarpat, tassani paasissutissaat ukiuinut, suaassusaannut, ilaqutariinnermi inissisimanerannut aammalu angerlarsimaffeqannginnermut pissutaasut?
 - b. Qanoq Naalakkersuisut nalilerpaat nunatsinni aaqqissuulluagaasumik nalunaarsuinnermut pisariaqaartitsisoqarnersoq imaluunniit angerlarsimaffeqannginnerup erseqqissarnissaanut?
5. Suliniutit suut aallartinneqareerpat imaluunniit pilersaarutaappat angerlarsimaffeqannginnerup suliniutigineqarnerata nukittorsarnissaa?
 - a. Qanoq ilillutik Naalakkersuisut qulakkeerniarpaat, angerlarsimaffeqannginnermut suliniutit suliniuteqarnissamik pilersaarutaannaassanngitsut, aammali ersarissunik malittarisassiorneqassasut, akisussaaffimmik inissiisoqassasoq tigussaasunillu suliniutissanik periarfissanik sanasoqassasoq?



6. Naalakkersuisut oqaluuserisamut soqutiginaatilinnik allanik paasissutissiisinnaanerlutik?

(Inatsisartunut ilaasortaq Per Berthelsen, Demokraatit)

Tunngavilersuut

Angerlarsimaffeqannginneq inuuniarnermi unammilligassaavoq imaannaanngitsoq, innuttaasumut ataasiakkaamut, ilaqutariinnut, kommuninut inuiaqatigiinnullu tamarmut kalluaasartooq. Suliniut eqaatsoq ersarinnerusunik sinaakkutinik pisariaqartitsivoq, akisussaaffimmik ersarissumik aammalu ajornartorsiutip annertussusaanut annertuumik ilisimasaqarnermik.

Ilisimassallugu pisariaqarpoq, qanoq maannakkut inatsisit pinaveersaartitsinermit suliamut iluaqutaasinnaanersoq angerlarsimaffeqannginnermit iluaqutaasinnaasoq. Tassungalu ilutigalugu pingaaruteqarpoq paasissallugu, suliaassat suut kommunimiinnersut suullu Namminersorlutik Oqartussaniinnersut, aammalu maannakkut sakkugineqartut naammannersut.

Toraagalimmik suliniutissanik aaqqissuussisinnaanermut pisariaqarpoq tutsuiginartunik paasissutissanik peqarnissaq, innuttaasut qassit angerlarsimaffeqannginnermut, sumiinnermut, aammalu suut peqqutaasimaneresut. Kommunini ataasiannaani aammalu nuna tamakkerlugu.

Suliniutit pingaaruteqarsinnaapput, naammannngillalli, ajornartorsiutip anneertussusaa pisariaqartitsissappat pinngitsoorani atorluarsinnaanerusunillu aaqqiissuteqarnissaq. Apeqquteqarnermut pissutaasoq taamaattumik unaavoq suliatigut piviusorsioortunik tunngaveqarnissaq politikikkut oqallisigeqqinneqarnissaanut, pisariaqartinneqarnermut ersarinnerusumik inatsiseqarnissaq, pitsaanerusumik nalunaarsuisarnissaq aammalu toraagalimmik suliniuteqarnerunissaq.

Apeqquteqaatima ullut suliffiusut qulit iluanni akineqarnissaat qilanaaraara.